



Sud Bosne i Hercegovine
Sud Bosne i Hercegovine

Broj: S1 3 Iž 043704 22 Iž
Sarajevo, 18.08.2022. godine

Sud Bosne i Hercegovine, u vijeću Apelacionog odijeljenja sastavljenom od sudija Dinke Bešlagić-Čovrk kao predsjednika vijeća, Vesne Trifunović i Zvezdane Antonović kao članova vijeća, odlučujući o žalbi Ivana Musića sa borakom u ..., izjavljenoj protiv Odluke Centralne izborne komisije Bosne i Hercegovine broj: 06-1-07-1-1341-1/22 od 04.08.2022. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opšte izbore 2022. godine, u nejavnoj sjednici, održanoj dana 18.08.2022. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što uz prijavu nije dostavio dokaz o državljanstvu Bosne i Hercegovine.

Žalitelj je protiv navedene odluke blagovremeno izjavila žalbu navodeći da je rođen i školovao se u Bosni i Hercegovini, da posjeduje pasoš izdat prije 1992. godine i da je nadležnom matičnom uredu u BiH poslao zahtjev za upis činjenice državljanstva BiH u matične knjige rođenih. Predlaže da se žalba uvaži jer želi glasati za političku opciju za koju smatra da će doprinijeti očuvanju države BiH.

Centralna izborna komisija Bosne i Hercegovine u odgovoru na žalbu predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave žalitelja za glasanje izvan BiH dostavljene dana 19.07.2022. godine, pravilno uočila da podnositelj prijave nije dostavio neki od važećih dokumenata u BiH. Naime, žalitelj je uz prijavu dostavio ličnu kartu Republike Hrvatske, ličnu kartu BiH kojoj je istekla važnost 2006. godine, izvod iz matične knjige rođenih Opštine Centra Sarajevo i Radnu knjižicu izdatu 1997. godine od opštine Centra Sarajevo. Time prijava žalitelja nije u skladu sa članom 3.15 stav 3 Izbornog zakona BiH („Sl.glasnik BiH“, broj 23/01 do 51/22) prema kome izbjeglo lice iz BiH koje se ne nalazi na Centralnom biračkom spisku, da bi ostvarilo biračko pravo, uz prijavu mora dostaviti dokaz o državljanstvu Bosne i Hercegovine.

Žalitelj uz prijavu nije dostavio ni jedan identifikacioni dokument propisan članom 9. Upustva o postupku slanja, prijema, obrade, arhiviranja i zaštite elektronskih prijava državaljana Bosne i Hercegovine za glasanje izvan BiH elektronskim putem („Sl. glasnik BiH“, broj 27/22), koji potvrđuje državljanstvo Bosne i Hercegovine. Ovaj nedostatak žalitelj nije otklonio ni u naknadno ostavljenom roku iz obavještenja od 02.08.2022. godine, te stoga i prema zaključku Apelacionog vijeća žalitelj ne ispunjava uslove za upis u izvod iz Centralnog biračkog spiska za glasanje izvan Bosne i Hercegovine.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

***Predsjednik Vijeća
Sudija
Dinka Bešlagić-Čovrk***